



Gemeinsam Äntwert vum Här Minister fir Energie, Claude Turmes, der Madamm Ministesch fir Konsumenteschutz, Paulette Lenert an der Madamm Ministesch fir Ëmwelt, Klima an nohalteg Enwécklung, Joëlle Welfring op d'parlamentaresch Fro n°6192 vum 13. Mee 2022 vum éierewäerten Deputéierte Marc Goergen iwwert Kontrakter mat Gasfournisseuren

Op Nofro hin huet SUDnergie matgedeelt, dass hinnen keen Fall bekannt ass wéi deen deen an der Fro vum éierewäerten Deputéierten beschriwwen gëtt. SUDnergie betount, dass si am Géigendeel Bierger esouguer incitéieren fir op erneierbar Energien ëmzeklappen andeem si zum Beispill, am Kader vun den Energieeffizienzobligatiounen déi all Stroum- a Gasfournisseuren hunn, de Leit Primen ubidden wann si hir Gas- oder Mazoutsheizung duerch eng Wärmepompe ersetzen.

Och aner Stroum- a Gasfournisseuren bidden iwweregens esou Primen un fir Haiser ze sanéieren respektiv op méi eng nohalteg an energieeffizient Heizung ëmzeklappen.

1) Huet de Staat eng Handhab driwwer, wa Leit hier Heizung wëlle renovéieren, mee dëst an engem Kontrakt tëscht dem Energieliwwerant an dem Konsument verhënnert gëtt?

Generell kann een feststellen, dass e Gaskontrakt zu all Moment kann gekënnegt ginn am Respekt vun de kontraktuellen Bedingungen, déi explizit laut Artikel 12, Paragraph 3 vum ofgeännerte Gesetz vum 1. August 2007 iwwert d'Organisatioun vum Gasmarché ("Gasgesetz") mussen am Kontrakt festgehale sinn. Déi meescht Kontrakter kënnen esou direkt gekënnegt ginn ouni zousätzlech Käschten, ausser de Client huet eventuell en zäitlech begrenzten Kontrakt ofgeschloss mat zum Beispill engem fixen Tarif iwwert déi gesamte Lafzäit.

Wann e Client säin Kontrakt ganz kënnegt a keen aneren Fournisseur an d'Spill kënnt, sou gëtt den zoustännegen Netzbedreiwer kontaktéiert, deen dann den Gaszieler ofmontéiere kënnt. Am Fall vun engem Wiessel vum Fournisseur muss dëse Wiessel nom Artikel 23, Paragraph 5 vum Gasgesetz innerhalb vun 3 Wochen ofgeschloss sinn.

Doriwwer eraus sinn d'Dispositiounen aus dem Code de la consommation iwwert d'mëssbräuchlech Klauselen applikabel, déi generell fir all Kontrakt tëscht engem Professionnellen an engem Konsument spillen.

2) Wéi vill Fäll goufen de Ministère bis elo matgedeelt, bei deene Persounen net aus hirem Kontrakt erauskommen, fir energetesch Sanéierungen duerchzeféieren?

Et si bis elo keng sou Fäll matgedeelt ginn.

3) Wéi wäert d'Regierung dofir suergen, dass an Zukunft all Bierger hei am Land op nohalteg Energiequelle kann ëmsteigen, och wa Kontrakter mat Energie-Liwweranten dëst blockéieren?

Sou wéi virdrun schonn erkläert kann all Haushaltsgasclient quasi zu all Moment de Gasfournisseur wiesselen oder séin Gaskontrakt kënnegen, et sief dann dass hien bewusst ee méi längerfristige Kontrakt ënnerschriwwen hätt, wou dann déi spezifesche Konditiounen vun deem Kontrakt mussen agehale ginn.

Wéi an der Aleedung och schonn ugedeit, hunn all Stroum- a Gasfournisseuren, déi Stroum oder Gas u Clienten zu Lëtzebuerg liwweren, eng Verpflichtung fir Energieeffizienzmassnahmen ze huelen fir de Verbrauch bei Clienten zu Lëtzebuerg ze reduzéieren andeems si beispillsweis op méi nohalteg Energien ëmklammen.

Doriwwer eraus sief ënnerstrach, dass mam staatlechen Subventionsprogramm "Klimabonus" (fréier „PRIME House“) d'Renovatioun vun Wunnebaier, d'Ersetzen vun Heizungen op fossiler Basis an ineffizienten Heizsystemer durch effizient Systemer op ernéierbarer Basis, sou wéi d'Produktioun vu Stroum mat Photovoltaikanlagen a Wunnebaier ënnerstëtzt ginn. Dëse Programm gouf 2020 däitlech no uewen ugepasst als eng vun de Moossnamen fir d'Relance no der Covid-Pandemie a gouf elo mat Effet ob den 1. Januar 2022 nach emol iwwerschaft. Eng zousätzlech Hëllef ("aide individuelle au logement"), déi op dem "Klimabonus" baséiert, gëtt demnächst nach agefouert fir vulnérabele Stéit mat nidderegem Akommes zousätzlech ënnert d'Äerm ze gräifen. En plus huet Lëtzebuerg e ganz nidderegen TVA-Taux ("taux super-réduit") vun 3% fir d'Renovéierung vun de Wunnebaier.

4) Am Hannergrond vun der Klimakris an der néideger Energietransitioun, wäert d'Regierung mat Südenergie souwéi aneren Energie-Liwweranten zesummekommen, fir besser Modalitéiten auszeschaffen, fir dass Clientë méi einfach aus hiren ale Kontrakter erauskommen?

Sou wéi Agangs erkläert, kënnen déi "kllassesch" Kontrakter direkt gekënnegt ginn an e Fournisseurswiessel ass innerhalb vun 3 Wochen méiglech ouni zousätzlech administrativ Käschten. Et wäert och weiderhin méiglech bleiwen fir méi längerfristeg Kontrakter unzebidden, bei deenen dann och déi kontraktuell ofgemaachte Bedingungen mussen agehale ginn.

Lëtzebuerg, den 21. Juni 2022
(s.) Claude Turmes
De Minister fir Energie